



19. februar 2010

UPA 2010/131

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

**Suliffissuarnik sanaartornissamik pilersaarusiortoqartillugu kiisalu aatsitassarsiorfissanik imaluunniit pinngortitamik annertuumik atuinissamik pilersaarusiortoqartillugu Kattuffiit attuumassuteqarsinnaasut tamarmik Naalakkersuisunit tusarniaavigineqartarnissaat pillugu Inatsisartut aalajangiiffigisassaattut siunnersuut.**

(Inatsisartunut ilaasortaq Aqqaluaq B. Egede, Inuit Ataqatigiit)

### **Tungavilersuut:**

Kalaallit Nunaata imminut oqartussaaffiginerata annertusiartornerani killiffitsinni pissutsit allat nallerpagut. Ineriartornitsinni ullumikkut killiffipput tassaavoq aningaasarsiornikkut nukittorsarfissarput annertuunik pilersaaruteqarfusoq.

Ukiuni makkunani suliffissualiornissamik aammalu aatsitassarsiorfiliornissamik pilersaarutit aatsaat taama annertutigisumik misissuiffigineqarlutik ineriartortinneqaleruttorput, inuiaqatigiittut ullumikkut inissisimanitsinnik annertuumik sunnuteqarsinnaasumik.

Aatsitassarsiorfiliornissat suliffissualiornissassallu pillugit paasititsiniaanerit ingerlanneqartarnerat illuinnaasiunngitsumik tamatigoortuussappata, pisariaqarpoq innuttaasunut paasititsiniaanerit tusarniaasarnerillu soqutigisanut arlaannaanulluunniit siumut pituttueriinngitsumik aaqqissuunneqartarnissaat.

Kalaallit Nunaata peqataaffigisaannik FN-imi Ataatsimeersuartut septembarip 13-ianni, 2007 aalajangersagaq Nunat Inoqqaavisa Pisinnaatitaaffii pillugit nalunaarummut tungasoq akuersissutigaat.

Tamanna pivoq nunarsuaq tamakkerlugu inuit nunat inoqqaajusut 370 millionit sinnerlugit amerlassuseqartut ukiut 20-it sinnerlugit isumaqatigiinniareernerisigut.

Nalagaaffiit Peqatigiit aalajangersagalialaat pineqartoq, ilaatigut innuttaasut pisortanit tusarniaavigineqartarnissaannik pingaarutilerujussuarmik aalajangersagaqarpoq, Nunatsinnit aamma eqqortinniagassatsinnik.

Isumaqatigiisummi immikkoortoq 32-mi aalajangersagaq ima oqaasertaqarpoq:

1. Nunat inoqqaavisa pisinnaatitaaffigaat ineriartornermut atuinermullu iliussissanik aalajangersaanissaq salliutitassanilu ineriartortitsinissaq aamma namminneq nunaminni nunanilu najukkaminni nunap nunalluunniit najugarisap ilaanik atuinissaq isumalluutinillu allanik atuinissaq.

2. Naalagaaffiit pisussaapput siunnersuissallutik aamma ajunngitsussamik siunertaqartumik nunat inoqqaavinik pineqartunik taakkua namminneq sinniisoqarnikkut suliffii aqputigalugit suleqateqassallutik kiffaanngissuseqartumik aamma paasinnilluni akuersineq anguniarlugu suliniummik sumilluunniit nunaannik nunanilu najugaannik attuisumik isumalluutinilluunniit allanik attuisumik akuersissuteqannginnermi, pingaartumik ineriartortitsinnermut, iluaqateqarnermut imaluunniit nammineq atortussianik, imermik aamma isumalluutaannit allanik piiaanermut tunngasuni.

3. Naalagaaffiit pisussaapput sukumiisumik iliuseqassallutik suliniutinut taama ittunut tamanut naapertuilluartumik pissusissamisoortumillu taarsiissuteqarnissamut, naleqquttunillu iliuseqartoqassaaq avatangiisinut, aningaasarsiornermut, inooqatigiinnermut, kultureqarnermut aamma anersaakkut inuuneqarnermut ajortumik sunniutit millisarniarlugit.

Isumaqarpunga Naalagaaffiit Peqatigiit aalajangersagaliaat siuliani issuariigara pingaaruteqaqisoq, siunissami Nunatsinni pisortat pilersaarusiortarnerini aalajangersaasarnerinilu minnerpaamik eqqortinniassallugu pisussaaffeqartugut. Taamaattumillu suliffissuarnik sanaartornissamik pilersaarusiortoqartillugu kiisalu aatsitassarsiorfissanik imaluunniit pinngortitamik annertuumik atuinissamik pilersaarusiortoqartillugu Kattuffiit attuumassuteqarsinnaasut tamarmik siunissami tusarniaavigineqartalernissaat pillugu Inatsisartut aalajangiussaqaqassasut siunnersuutigaa.

Siunnersuutip qulakkiissavaa Kalaallit Nunaata innuttaasalu pingaartitaasa innarlitsaaliorneqarnissaat aammalu ineriartornerup ingerlanerani inuiaqatigiinni oqallinnerit tamatigoornerusumik ingerlanneqartalernissaat.

Taamatut oqaaseqarlunga siunnersuutip Inatsisartunit ilassilluarneqarnissaanik neriuteqarlunga saqqummiussivunga.